

Grupo di Ponton ta para ariba cu

Ruta 'nobo' proponi pa SAC ta problematico

ORANJESTAD – E grupo preocupado di Ponton, ta confia cu lo bin un solucion amical pa e asunto di ruta nobo pa Carnaval di Playa otro aña, pero ta sigui brinca e ruta nobo proponi pa SAC. Indicando cu nan tin rasonnan critico pa obhecciona na e ruta proponi, nan mes ta propone un ruta cu ta esun miho pa tur hende. Banda di esaki, nan ta keda habri pa cualkier alternativa, contal cu e no ta esun cu aworaki tin proponi pa SAC.

Como muestra di protesta, a colecta mas di 200 firma di cas (no hende) cual nan lo kier presenta na gobierno proximalmente. Como prueba nan a presenta esaki ayera 'ter inzage' pa prensa por a comproba su veracidad y existencia. "Pero nos kier presenta esaki prome na Gobierno" Emile de Cuba, liderando e grupo aki ayera a bisa durante un conferencia di prensa.

De Cuba, hunto cu personanan conoci den comunidad manera Jacques van Veen, Connie van Niel y Ruben Garcia, a profila nan mes ayera publicamente, hunto cu un grupo di persona mas cu no por tabata presente pa motibo di trabou. Pero nan ta sigur cu nan ta representativo di un grupo di persona preocupado y rabia cu e idea di pasa un parada riba e ruta



cu a keda proponi.

Falta di oido di parti di SAC ta e motibo principal porta cu nan a presenta nan mes publicamente atrobe ayera, pa wak si asina nan por 'haya' atencion di SAC pa cu e problema aki y mira cu nan por keda cla prome cu e decision final cai.

"Nos no tin pura" De Cuba a sigura BONDIA ARUBA ora cu a puntra ki tempo nan kier 'rond af' e asunto aki. Nan tin tur confiansa cu tur cos lo sali bon y cu sano huncion lo prevalece.

Mientras cu nan a presenta nan mes ayera publicamente, nan a indica cu un relato inicial, cu ta ma-

sha tempo e 'asunto aki' ta broei' y cu ta awor nan a sinti cu ta necesario pa trece esaki den publicidad mas formalmente. Dia 8 juni 2011 un carta a worde ricibi di SAC pidiendo cooperacion y aprobacion pa cu e "ruta nobo" di Carnaval. Si tin puntanan contra mester informa SAC prome cu dia 13 juni 2011 termino irrazonablemente cortico pues.

Dia 15 di juni nan a reuni cu ministernan Hooiboer-Winklaar y Dowers exponiendo nan preocupacionnan y sugiriendo e ruta alternativo di Sasaki. Loke a indigna e grupo ta cu SAC ta bisa den un matutino dia 17 juni

2011: "No a haña keho oficial na SAC di parti di e habitantenan di e ruta", esaki no ta corecto. A pesar di e termino irrazonablemente cortico, varios carta a worde manda pa SAC cu mas di 50 firma.

Juni 26 2011 ta ricibi un otro carta di SAC cu tin un reunion dia 28 juni 2011 na Centro di barrio Noord; Otro biaha termino irrazonablemente cortico.

Despues di esaki e grupo di habitante ariba e ruta menciona a forma un comision pa purba sinta cu SAC pa dialoga pa cu nan preocupacionnan.

SAC a worde invita pa un

reunion den e siman di dia 11 juli 2011; nunca nan a get back na nos pa acepta of rechaza e invitacion. "Nos a invita e gruponan pa sinta cu nos. Lamentablemente e reunion aki a wordu sabotea na un manera bow nivel door di SAC.

Despues nos a tuma nota di un articulo den Amigoe di Aruba di dia 12 di augustus 2011 den cual SAC ta comenta: "Het is maar een klein groepje die tegen is" y cu nos mester ta contento cu nan a "consulta" nos, "normalmente nan ta gewoon dicidi y cla ta." De Cuba a sigui bisa.

Despues a bolbe invita SAC un biaha mas y nan a reuni dia 16 Augustus 2011. Nan a bolbe expone nan preocupacionnan y nan a keda di bai sinta cu e instancianan concerni y purba haña atencion pa nan preocupacionnan. Te awor no a tende nada ainda di SAC.

Biniendo bek ariba e ruta, nan kier menciona cu e ruta di Vondellaan pa Boulevard ta e mihor ruta cu tin pa e parade di Carnaval.

Lastimamente door di cambianan structural ariba e caminda aki, mester bin cu un ruta di Carnaval nobo di cual esun di Noord pa Eagle cu ta worde papia ariba dje awor definitivamente no ta esun di mihor cu tin. □

Segun fuentenan a revela na BONDIA ARUBA den fin di siman

SAC asombra cu actitud di grupo di Ponton riba ruta

ORANJESTAD – E organisacion nacional di Carnaval di Aruba no ta interesa mas pa papia cu e grupo di Ponton riba asunto di ruta. Esaki BONDIA ARUBA a compronde di su fuentenan den seno di SAC den fin di siman. Nan a tuma nota di e declaracionnan haci di e grupo aki y a keda mas bien asombra di loke nan a tende.

E asombro ta basa riba e hecho cu BONDIA ARUBA a compronde di nan cu tabatin un palabracion cu ningun partido lo a bai corant "Nos a palabra di traha riba e ruta y no ta bai media tanten cu no ta mas leu" e fuente a bisa BONDIA ARUBA den fin di siman. " Pero aparentemente nan a dicidi di bai prensa" e fuente a bisa, bisando mesora tambe cu nan no tin nada mas di papia cu e grupo aki.

E grupo di Ponton tabata sa cu SAC a bisa nan cu ta Gobierno mester a tuma e deci-

sion final ya cu ta Gobierno ta doño di caminda na Aruba. E afspraak tabata pa tin un decision pa 1 di augustus, pero debi na vacacion, hopi hende no por a atende e reunion pa cual ningun decision por a cai. Aworaki e situacion ta status quo, y un decision mester cai prome cu 11 di november proximo ora cu temporada di carnaval cuminsa oficialmente.

BONDIA ARUBA a compronde cu e idea tabata pa wak kico e problemanan di e ruta sugeri tabata, y unda cu tabatin mester tin solucion, lo a traha riba esaki. "Y pa esaki Gobierno lo tuma su pasonan p.e. laga drecha loke mester y mira e infraestructura" e fuente a bisa BONDIA ARUBA.

E comision cu ta trahando riba e ruta, mester a duna Gobierno cua ruta nan ta mira como esun mas factibel. Y finalmente ta Gobierno ta esun cu lo tin cu anuncia esaki, pasobra

atrobe tin cu corda cu caminda ta di Gobierno.

Na tur, e situacion awor ta haya un 'twist' diferente unda cu un grupo di persona ta muestra cu nan no ta eens cu e ruta cu SAC a propone, siendo cu e ruta no ta ni oficial ainda y cu awor nan ta haci como si fuera ta SAC ta esun culpabel di tur. Esaki siendo cu BONDIA ARUBA a compronde cu tin palabracion haci cu lo no a papia nada publicamente prome cu tin un solucion. Tabata siman pasa cu e grupo di Ponton a bin afo pa muestra nan malcontento riba e asunto di ruta y cu nan no ta compronde e actitud di SAC riba henter e desaroyo aki. Nan a bai hopi detaya pa loke ta e ruta y kico ta su pro y contra y con nan ta mira henter e asunto. Nan a tira tur culpa riba SAC y a muestra mes momento tambe nan ruta alternativo cu nan a sugeri, pero cu nan no a haya ayudo ariba. □